

O Sgio cunsiglieru,

Dipoi ch'è no simu ghjunti à u capu di a Cullettività Territoriale di Corsica, mi pare ch'è no àppiimu pruvatu a nostra **vulintà chjara** di dà à l'uggettivi ambiziosi di i piani di sviluppu di a Cullettività Territoriale di Corsica pè a lingua corsa i mezi ch'è accòrrenu : **duppiamentu di i mezi finanziariii da u 2011, triplicamentu di i mezi umani.**

Sò d'accunsentu ch'è u prublemu maiò di a rièsciuta di u pianu di sviluppu di l'insignamentu di a lingua corsa definitu ind' u PRDF hè quellu di a furmazione di l'insignanti.

Aghju scrittu à u ministru di l'educazione Luc CHATEL l'òndeci d'ottobre scorsu per rammentà a necessità di un "pianu eccezziunale di furmazione di l'insignanti à u bislinguisimu" previstu in u PRDF. U ministru ùn hà ancu rispostu nantu à u fondu ma pare dispostu à sviluppà l'azione pè a lingua corsa, cum'ellu l'hà assicuratu u Rettore à u Cunsigliu acadèmicu di a lingua corsa, u trenta di nuvembre scorsu.

Aghju ancu dumandatu à i mo servizii di studià cù u Retturatu e misure chì a CTC puderia aiutà à mette in ballu è sustene in u quadru di a cunvenzione addizionale cù u Statu.

Vulerebbe precisà chì u **PRDF “lingua è cultura corsa”** aduttatu di ghjugnu 2006 ùn hè micca statu fattu da u cunsigliu di a lingua corsa, ma da u serviziu lingua corsa travagliendu in u quadru di una cummissione tematica cù l’eletti di l’Assemblea di Corsica è tutti i partenarii (Retturatu, Cunsigliu ecunòmicu suciale è culturale, universitarii, ...).

Hè u **“Pianu strategicu” sucietale** di u 2007 chì hè statu preparatu cù u cuncorsu di u Cunsigliu è di u so cumitatu scientificu. Bella sicura i travagli sò stati messi in cuerenza : u PRDF hà integratu i primi avisi di u cumitatu scientificu, cum’è u Pianu Strategicu hà integratu l’uggettivi priuritarii scritti ind’u PRDF.

In quantu à u ricrutamentu, un avisu di chjame à candidature hè statu publicatu à l’internu è à l’estenu di a Cullettività Territoriale di Corsica u 5 di nuvembre 2010.

Una selezione hè stata pruposta da l’amministrazione, pigliendu in contu in priorità i funziunarii titolari, cum’ella hè di regula. Sò stati audiziunati da una cummissione cumposta da u direttore generale di i servizii è a direttrice di a lingua corsa.

Pè u postu di capiserviziu, ci hè statu trè candidati, tutti audiziunati. Eranu dumandate una cumpetenza di spertizia linguistica, una cunniscenza scintifica, una sperienza in sociolinguistica è dinù a maestria di e nove tecnulugie di l'infurmazione è di a cumunicazione.

Pè u postu di animazione è di cunsigliu, una selezione di 6 persone hè stata fatta, nantu à u so prufilu : cumpetenze è sperienza pè a lingua corsa, sperienza dinù in u duminiu sucietale è in e nove tecnulugie. Pè i dui posti, capacità di sintesi, abilità à a cuncertazione, à l'urrganizzazione d'evenimenti, à a cumunicazione, à e rilazione pùbliche eranu apprezzate.

Ma a scelta di persunali di a CTC ùn tocca à altru nimu di falla chè à a CTC. U Presidente di u Cunsigliu Esecutivu hè u capu di i persunali territoriali è sceglierà frà e persone cumpetente chì sò state selezziunate da a cummissione.

Vi ringraziu.